



Inatsisartunut ilaasortaq Pele Broberg, Partii Naleraq
Inatsisartut Allattoqarfiat
/-Maani

Suluusalinnut mittarfiit nutaat pillugit danskit naalakkersuisuisa Naalakkersuisullu akornanni isumaqatigiissutit pillugit § 37 naapertorlugu apeqqummut nr. 2019/138-imut akissutit.

Asasara Pele Broberg,

Inatsisartut Suleriaasianni § 37 naapertorlugu suluusalinnut mittarfiit nutaat pillugit danskit naalakkersuisuisa Naalakkersuisullu akornanni isumaqatigiissutit pillugit Naalakkersuisunut apeqquteqarsimavutit. Apeqqutigisatit uannit akisassanngortinneqarsimapput.

22-03-2019
Postboks 1015
3900 Nuuk
Oqarasuaat (+299) 34 50 00
Fax (+299) 32 50 02
e-mail: govsec@nanoq.gl
www.naalakkersuisut.gl

Apeqqutigineqartut ima oqaasertaqarput:

- 1. Naalakkersuisut, Danmark-imilu Naalakkersuisut, 10. September 2018-imi isumaqatigiissutaasa ilassutitut isumaqatigiissutaat naapertorlugu "Isumaqatigiissutigineqarput ingerlatseqatigiiffiup nutaap ileqqoreqqusassai, ataatsimut piginneqatigiissutit aqunneqarnissaanik piginnittunut isumaqatigiissut kiisalu allagaatit tunngaviusut", Naalakkersuisut siunissami qaninnerusumi tamassumap imarisaanut pisortatigoortumik saqqummiussaqaassappat? Tamassuma saniatigut imarisaanut attuumasunik allanik, isumaqatigiissutissanilluunniit allanik, siunissaq qanittumi saqqummiunneqartussaqaapat piffissalikkamik Naalakkersuisut nalunaarnissaannut peqquneqarput.**

Kalaallit Airports International A/S pillugu piginnittuunermut isumaqatigiissut ullormi 6. marts 2019 atsiorneqarpoq, ullormilu 8. marts 2019 Aningaasaqarnermut Akileraartarnermullu Ataatsimiititaliamut nassiunneqarluni.

Soorlu Inatsisartut Aningaasaqarnermut Akileraartarnermullu Ataatsimiititaliamik ullormi 4. marts 2019 ataatsimeeqateqarninni paasissutissiissutigineqartoq piginnittuunermut isumaqatigiissutip atsiorneqarnissaanut Naalakkersuisut qilanaarsimapput, taamaalillunilu isumaqatigiinniarnertit siuariartorfiunerat aamma niuernerup tungaatigut eqqarsaatigisassat eqqarsaatigalugit isumaqatigiissutissamut taamaattumut missingiutip isertuunnissaa pisariaarussimammat.

Kalaallit Airports International A/S-imi ileqqoreqqusanut tunngatillugu paasissutissiissutigissavara ingerlatseqatigiiffimmi ataatsimeersuarnissaq naalagaaffiup piginneqataasutut ilaalerfissaa suli ingerlanneqarsimanngimmat. Tamanna qaamatip matuma naalernerani ingerlanneqassaaq. Ileqqoreqqusat atorsinnaalersussatut ataatsimeersuarnermi akuersissutigineqartussaammata massakut ileqqoreqqusanik tunniunneqarsinnaasunik peqartoqanngilaq. Ataatsimeersuarnissaq

taaneqartoq ingerlanneqareerpat ileqqoreqqusat Kalaallit Airports International A/S-imut saaffiginnilluni piniarneqarsinnaalissapput.

Isumaqatigiissummi tamarmiusumi allagaatit allat - Naalackersuisut danskillu naalackersuisuisa akornanni ulluni 10. september 2018 aamma 27. februar 2019 naalackersuinikkut isumaqatigiissutaasut pinnagit, Naalackersuisut nittartagaatigut tamanut saqqummiunneqartut - Naalackersuisut peqataaffiginngilaat.

Kalaallit Airports Holding A/S-ip aamma Finansministeeriaqarfiup akornanni piginnittuunermut isumaqatigiissut tassungalu atatillugu aningaasaliisoqarnissaanut isumaqatigiissut tamanit takuneqarsinnaatitaammata paasissutissiissutigisavara. Tamakku Kalaallit Airports-ip nittartagaani *kair.gl*-imi takuneqarsinnaapput.

Apeqqutigineqartumut allanik ilanngussassaqaanngilanga.

- 2. Naalackersuisut Siulittaasuata mittarfissuit pillugit suliaq, piviusut akerlianik, tunuliaquteqarluarneraalluni amerlanerussuteqangaatsiartut akuersissutigineqartut suliassanngortinneqarsimaneranik oqariartuuteqarpoq. Taamaakkaluartoq sooruna isumaqatigiissutit, isumaqatigiissutissatulluunniit pilersaarutigineqartut imarisaat ammasumik saqqummiunneqanngisaannartut? Mittarfiit assortuussutaasut pillugit, isumaqatigiissutinik inuiaqatigiinnut ammasumik Naalackersuisut saqqummiussaqaarnikuusimagunik, qinnuigineqarput taakkunanga takussutissartalimmik ersarissaassasut.**

Isumaqarpunga Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaannut nr. 4, 22. november 2018-imeersumut Inatsisartuni naalackersuinikkut isumaqataalluartoqartoq. Tamatumunngalu inatsisip Inatsisartuni pingajussaaneerlugu suliarineqarnerani 18-it isumaqataanerisigut qulingiluallu akerliunerisigut kiisalu marluk akerliunatik isumaqataanatillu taasinerisigut akuersissutineqarsimanagera tunngaviuvoq.

Inatsit aqqutigalugu Kalaallit Airports International A/S-imi naalagaaffiup 700 mio. kr.-nit angullugit aningaasaatinik amerlisaasinnaaneranut Naalackersuisut akuersisinnaatitaapput. Ilanggullugu inatsit aqqutigalugu Naalackersuisut Kalaallit Airports International A/S-imi piginneqataasinnaaneq pillugu danskit naalackersuisunik piginnittuunermut isumaqatigiissusiornissamik piginnaatinneqarput.

Tamanna tunngavigalugu isumaqarpunga mittarfiliortiternissaq aamma Kalaallit Airports International A/S-imi peqataanissaq pillugit naalagaaffimmik isuma-

qatigiissut naalackersuinikkut isumaqatigineqarluartoq oqaatigissallugu tunnga-
vissaqarluarlunga.

Tamatuma saniatigut apeqqut 1-imut akissutigisakka innersuussutigissavakka, tas-
sanilu allagaatinik Kalaallit Airports International A/S-imi naalagaaffiup peqa-
taanissaa pillugu isumaqatigiisummut attuumassutilinnik massakut tamanut
saqqummiussisoqarnissaa pineqarpoq.

Apeqqutigineqartumi isumaqatigiisutit atsiorneqareersut atsiorneqartussaalluun-
niit imarisaannik Naalackersuisut tamanut saqqummiussinngisaannarnerannik
oqartoqarnera eqqortuunngilaq.

Aallaaviatigut Naalackersuisut akisussaaffigalugit suliaat tamanut ammasuupput
aamma Pisortat ingerlatsineranni suliassat suliarineqartarnerat pillugit Inatsisartut
inatsisaat malillugu suliarineqartarlutik. Tassunga ilaatillugu Naalackersuisut su-
liassaqarfiit ilaannik tamanut ammatitsinerupput, tassalu pisortat ingerlatsineranni
suliassat suliarineqartarnerat pillugit inatsimmi aalajangersarneqartut malillugit
atortut paasequsaasut saniasigut tamat paasisaqarsinnaanerat periarfissaqalermat.

Pisortat ingerlatsineranni suliassat suliarineqartarnerat pillugit suliassani isuma-
qatigiisutit Naalackersuisut peqataaffigisaat aamma ilaapput.

Taakkunungalu takunnissinnaatitaanermut pisinnaatitsinermit mininneqartut
nassuiarluarneqarsimasut ilaapput, soorlu assersuutigalugu inuinnarnut paasis-
tissat imaluunniit aningaasaqarnikkut pingaaruteqarluinnartut tamanut saqqum-
miunneqannginnissaat.

Ilanngullugulu inatsimmi immikkut erseqqissarneqartoq tassaavoq pisariaqarti-
tsineq naapertorlugu illersuisoqarniarpat paasisutissat pisortat aningaasaqarnik-
kut soqutigisaannut tunngassuteqartut, soorlu pisortat suliffeqarfinnik ingerla-
tsinerannut tunngassuteqartut, pisortat isertuussinnginnissaannut ilaassanngitsut.

Aalajangersakkat taamaattut inuinnaat aningaasarsiornikkulluunniit soqutigisaat
pingaarutillit illersorniarlugit pisortat takunnissinnaatitaaneq ajornerannut tunnga-
viusut pisortat ingerlatsineranni suliat suliarineqartarnerat pillugit inatsisip atuuti-
lerneranili atuupput, tassalu 1970-imiilli. Isumaqarpunga suliassaqarfimmut male-
ruagassat atuuttut ileqquusullu naapertorluarlugit Naalackersuisut sulinertik aquk-
kaat.

Inussiarnersumik inuulluaqqusillunga



Kim Kielsen